

## **Ti bato papye**

Flot flote ti bato papye  
Flot flote sarye tu mo bann rev

Pena pli rapid ki twa dan kanal  
Dibwa, lapay, feyaz, enn par enn to manze  
Mo galup bor kanal pu swiv twa  
Dan mo lespri, mo leker, mo lam nu form enn sel  
Dilo dan kanal gid to destine, gid mo destine

Flot flote ti bato papye  
Flot flote sarye tu mo bann rev


To ti pavyon kart bis ape balanse  
Lor enn baton zalimet fezer dan so dibute  
Mo ti leker bat tranble per to devire  
Kot dilo so kumansman, kot dilo so finisyon  
Eski tu kitsoz finalman pa enn ilizyon

Flot flote ti bato papye  
Flot flote sarye tu mo bann rev

To pa konsyan ki ena gran gran danze  
Komye avan mwa finn anvoy enn kuma twa  
Komye apre mwa pu anvoy enn kuma twa  
Dimunn pe dir ki tultan listwar repete  
Ek mo lespwar ek to kuraz nu pu fer listwar

Flot flote ti bato papye  
Flot flote sarye tu mo bann rev

*Alain Fanchon  
Kreol Morisyin*



**2014**

***46 ans d'indépendance de l'île Maurice | 46 jaroj de sendependa Maüricio***

Pdf: <http://goo.gl/dZzny6> (+...\_par\_Alain\_Fanchon.docx)

<http://www.linguistic-rights.org/kreol/>